

**प्रादेशिक समाचार
आकाशवाणी जयपुर-अजमेर**

दिनांक 22.04.2024

समय: 18.45 बजे

000000

- राज्य मांय लोकसभा चुनाव रा दूजा दौर सारू प्रचार रा महज दो दिन बच्या-सियासी पार्टियां रा नेता अर उम्मीदवार प्रचार मांय पूरो जोर लगायो।
- उप निर्वाचन आयुक्त राज्य मांय दूजा दौर रा चुणाव वाळा हलकां रा अहलकारां सागे मीटिंग कर र व्यवस्थावां रो जायजो लीनो।
- लोकसभा चुनाव मांय घर ऊं वोट देवण रा पात्र मतदातावां मांय ऊं 97 फीसदी ऊं बत्ता मतदाता वोट दीना।
- विश्व पृथ्वी दिवस रे मौके राज्य मांय केई कार्यक्रम राख्थी ज्या।

0000

राज्य मांय लोकसभा चुनाव रा दूजा दौर रा तैत 26 अप्रैल ने व्हेवण वाळा मतदान सारू प्रचार रो काम खत्म व्हेवण मांय महज दो दिन बच्या है। इण ने ध्यान राखता थकां सियासी पार्टियां रा नेता, स्टार प्रचारक अर उम्मीदवार जनता ने खुद रा पक्ष मांय करण सारू पूरो जोर लगा रह्या है। मुख्यमंत्री भजन लाल शर्मा आज अजमेर अर किशनगढ मांय राख्थी ज्या चुनावी कार्यक्रमां मांय सिरकत कीनी। वे कांग्रेस री आलोचना कीनी अर कह्यो के वां री पार्टी देश रा विकास , गरीब कल्याण अर सरहद री हिफाजत समेत न्यारा-न्यारा हलकां मांय खास काम कीनो। अजमेर ऊं भाजपा रा उम्मीदवार भागीरथ चौधरी पुष्कर मांय रोड शो निकाळ्यो। मुख्यमंत्री भजनलाल अर उपमुख्यमंत्री दिया कुमारी आज बूंदी मांय कोटा लोकसभा सीट ऊं भाजपा रा उम्मीदवार ओम बिरला री हिमायत मांय रोड शो कीनो। राज्य रा पैली वाळा मुख्यमंत्री अशोक गहलोत आज सिरोही जिला रा शिवगंज अर माउंट आबू मांय जालौर लोकसभा सीट ऊं कांग्रेस रा उम्मीदवार री हिमायत मांय रोड शो कीनो। ई पाछे वठे राख्थी ज्यी जनसभा मांय गहलोत भारतीय जनता पार्टी माथे आरोप लगाया। गहलोत पाली जिला रा कोयलवाव गांव कने पाली सीट ऊं कांग्रेस री उम्मीदवार संगीता बेनीवाल री हिमायत मांय राख्थी ज्यी जनसभा मांय राज्य री लारली कांग्रेस सरकार रा काम रो जिक्र कीनो अर केन्द्र सरकार माथे न्यारा-न्यारा आरोप लगाया। भारतीय जनता पार्टी रा स्टार प्रचारक अर प्रधानमंत्री नरेन्द्र मोदी रो काल

टोंक—सवाईमाधोपुर लोकसभा हलका मांय टोंक जिला रा उनियारा मांय जनसभा ने संबोधित करण रो कार्यक्रम है।

0000

निर्वाचन आयोग रा उप—निर्वाचन आयुक्त मनोज कुमार साहू राज्य मांय लोकसभा चुणाव रा दूजा दौर वाळा हलकां रा जिला कलेक्टरां अर एस.पी. सागे वीडियो कांफ्रेंस रे मार्फत मीटिंग कीनी। वे ईवीएम ऊं जुड्या प्रोटोकॉल री पूरी पालना करण बाबत कह्यो। उप—निर्वाचन आयुक्त गर्मी ने ध्यान राखता थकां जरूरी व्यवस्थावां करण रा हुकम ई दीना।

00000

लोकसभा चुणाव रा दूजा दौर मांय चुणाव रो काम ठीक तरीका ऊं करावण सारु प्रशासन ई लगातार कोशिश कर रह्यो है। केकड़ी री जिला कलेक्टर श्वेता चौहान सावर हलका रा गिरवरपुरा, घटियाली, बाजटा अर टांकावास मांय मतदान केंद्रां रो दौरा कर र व्यवस्थावां रो जायजो लीनो अर जरूरी हुकम दीना। बूंदी री सरकारी स्कूल मांय पोलिंग पार्टियां रा कर्मचारियां ने न्यारी—न्यारी सिखावण दीरीजी।

000000

लोकसभा चुणाव रा राज्य मांय दूजा दौर रा तैत 26 अप्रैल ने बत्ता ऊं बत्ता पात्र मतदातावां री भागीदारी तैय करण सारु स्वीप रा तैत न्यारा—न्यारा कार्यक्रम राख्या जा रह्या है। पाली जिला रा सोजत रोड मांय स्कूली बच्चा नुक्कड़ नाटक रे ज़रिए वोट री अहमियत बताता थकां वोट ज़रूर देवण री अपील कीनी अर मतदातावां ने वोट ज़रूर देवण री सौगंध दिरायी ज्यी। अजमेर मांय जिला प्रशासन अर स्वीप टीम री ओर ऊं आज **“अजमेर देगा वोट”** वेबसाइट री सरुआत करी ज्यी। ई माथे अजमेर रा गांवाई हलकां सारु ऑनलाइन होड़ां अपलोड करी ज्यी है। अजमेर मांय बत्ता ऊं बत्ता पात्र मतदातावां कानी ऊं वोट देवणो तैय करण रा मकसद ऊं **“मिशन डिस्टिक्शन और मिशन मेरिट”** चलायी ज्या है। जिला प्रशासन चुणाव ऊं जुड्या कामां वाळा 21 महकमां रा कर्मचारियां ने सर्तिफिकेट दे र नवाजेला। मतदातावां ने वोट देवण रो न्यौतो देवण सारु जिला कलेक्टर भारती दीक्षित हिंदी, मारवाड़ी अर सिंधी भाषावां मांय मतदान निमंत्रण पत्र रो ई विमोचन कीनो। केंद्रीय संचार ब्यूरो , सवाईमाधोपुर री ओर ऊं मतदाता जागरूकता संगोष्ठी राख र संगोष्ठी मांय मौजूद महिलावां ने मतदान प्रतिशत बधावण रो संकल्प दिरायी ज्यो। सांचौर

मांय सतरंगी सप्ताह रा छठा दिन रंगोली बणा र मतदाता जागरूकता रो संदेश दियो ज्यो। महिला मार्च मांय शामिल आंगनबाड़ी कार्यकर्ता, ए.एन.एम, आशा सहयोगिनियां अर स्वयं सहायता समूहां ऊं जुड़ी महिलावां **“मतदान दिवस, 26 अप्रैल” को अधिक से अधिक मतदान** रो संदेश दीनो।

बूंदी मांय महिला अर बाल विकास विभाग ऊं जुड़ी महिलावां न्यारी-न्यारी ठोडां रंगोली बणायी अर मार्च निकाळ र वोट देवण रो संदेश दीनो। ई सागे ई नारंगी रंग की थीम अर **वोट करूंगी तभी आगे बढ़ूंगी** नारा सागे लोकतंत्र रा त्यौहार मांय भागीदारी करण री अपील करी ज्यी। जालोर जिला मांय सतरंगी सप्ताह रा तहत आज जिला, उपखण्ड अर ग्राम पंचायत स्तर माथे मतदान केन्द्रां सामी रंगोली बणा र वोट जरूर देवण री अपील करी ज्यी। जिला मुख्यालय माथे कलेक्ट्रेट अर नगर परिषद परिसर मांय **मतदान 26 अप्रैल को, वोट भूलज्यो मती** रो संदेश देवण वाळी बहुरंगी रंगोली बणायी ज्यी। बांसवाड़ा रा खेल स्टेडियम मांय स्कूली विद्यार्थी मानव श्रृंखला बणा र **‘आपड़ो वोट, आपड़ी सरकार’** रो सन्देश मांड र वोट देवण री अपील कीनी।

0000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला।

.....

बाडमेर रा जिला निर्वाचन अधिकारी निशांत जैन ई वोट जरूर देवण री अपील कीनी है।

.....

000000

लोकसभा चुनाव रा दूजा दौर रा तैत राज्य मांय पात्र बुजुर्गा अर दिव्यांगजन ने घर ऊं वोट देवण रो सुबीतो दियो जा रह्यो है। पाली मांय 100 साल री एक महिला घर ऊं वोट दीनो। ई पाछे वे खुशी जताता थकां प्रशासन रो धन्यवाद कीनो। राज्य रा मुख्य निर्वाचन अधिकारी प्रवीण गुप्ता बतायो के प्रदेश मांय मतदान रा दोन्यूं दौर मांय घर ऊं वोट देवण रा पात्र बुजुर्गा मांय ऊं 97.57 फीसदी अर 97 फीसदी ऊं बत्ता पात्र दिव्यांगजन घर ऊं वोट दीना है। वे बतायो के राज्य मांय लोकसभा चुनाव रा दोन्यूं दौर मांय हाल ताई 73

हजार 248 पात्र मतदाता घर ऊं वोट दीना है, ज्यां मांय 56,284 बुजुर्ग अर 16,964 दिव्यांग मतदाता शामिल है। गुप्ता बतायो के मतदान रा दूजा दौर वाळी 13 सीटां माथे ई घर ऊं वोट देवण रा पात्र मतदातावां मांय ऊं 97 दशमलव 03 फीसदी घर ऊं वोट दीना है। वे बतायो के प्रदेश मांय हाल ताई 82 हजार 380 पुलिसकर्मी, 12 हजार 141 आर. ए. सी. रा जवान, 945 जी.आर.पी. रा जवान, एक हजार गैर सरकारी गाड़ियां रा ड्राइवर अर एक लाख 8 हजार 955 दूजा कर्मचारी वोट देवण रो हक इस्तेमाल कर लीनो है। मतदान रा दूजा दौर वाळा लोकसभा हलकां मांय अ अहलकार अर कर्मचारी 25 अप्रैल ताई वोट दे सकेला।

00000

विश्व पृथ्वी दिवस रे मौके धरती अर पर्यावरण ने बचावण रा बारा मांय जाग जगावण रा मकसद ऊं आज प्रदेश मांय न्यारा-न्यारा कार्यक्रम राखी ज्या। **झुंझुनू** मांय पृथ्वी विज्ञान मंत्रालय अर वन विभाग री ओर ऊं बीड़ हलका मांय स्कूली विद्यार्थियां ने हिरण सफारी करवाई ज्यी। ई सागे ई पौधा रोपी ज्या अर विचार गोष्ठी राखी ज्यी। गोष्ठी मांय प्लास्टिक रा गलत असर री जाणकारी देता थकां प्लास्टिक काम नी लेवण री सौगंध दिरायी ज्यी। ई दौरान नारा लेखन, चित्रकला अर गायन री होड़ां राखी ज्यी। **भरतपुर** मांय ई आर.डी. गर्ल्स कॉलेज अर सिविल लाइंस राजकीय अंग्रेजी माध्यम विद्यालय मांय पौधा रोपी ज्या अर पर्यावरण बचावण री सौगंध दिरायी ज्यी। केवलादेव राष्ट्रीय उद्यान मांय राखी ज्यी संगोष्ठी मांय प्रदूषण कम करण सारू बत्ता ऊं बत्ता पौधा लगावण री अपील करी ज्यी। ई रे अलावा रेहडी-पटरी वाळां ऊं पॉलीथीन री थैलियां मांय सामान नी बेचण री अरज करी ज्यी। **चूरू** रा स्कूल-कॉलेजां मांय ई विचार गोष्ठियां अर सेमिनार राख र पर्यावरण ने बचावण री शपथ दिरायी ज्यी। **धौलपुर** मांय ई वन विभाग री ओर ऊं होड़ राखी ज्यी। **डूंगरपुर** मांय जिला विधिक सेवा प्राधिकरण अर वन विभाग री ओर ऊं सीमलवाडा कोर्ट परिसर मांय पौधा रोपी ज्या।

00000